

宋文憲公全集

冊四

平定回疆方略

卷之三

宋文憲公全集卷六

元故韶州路儒學教授曾府君石表辭

府君諱順字至順姓曾氏廬國公四十九代孫廬國家於魯十四傳至都鄉侯據始避新室之亂徙豫章子孫日盛大江之南言曾氏者皆宗焉又六傳至略遷於臨川又十二傳至唐沂州刺史可徒生司空洪立司空生散騎常侍延鐸常侍又遷于南豐生四子長曰仁畧生志及文照南唐時又同遷臨江新淦縣之吉陽里文照舉童子科生乾度宋淳化三年進士仕至太常少卿贈刑部尚書志生易用易用生侃侃生高安丞擢元祐六年進士第又遷縣之高元里屏山之下生用先用先生嶽嶽生愿正愿正生翊翊生汝舟汝舟生兼善能傳黃文肅公幹之學爲時名儒生軍器監簿天麒天麒倜儻有大志常居文信公天祥幕府又從賈丞相餘慶等奉使於元竟全節而歸則府君之父也府君性警敏自幼輒有聞時信公之弟文惠公璧來爲郡招府君與其子文莊侯陞共學陞旣秀穎府君能與之競爽其師胡君端一亟目之爲二俊當宋初改物遺黎故老猶有存者監簿君日開尊共飲劇談先代文獻府君從旁聽之有疑則問唯恐其不傾盡諸老爲之嘵嘵愛賞元至正中程文憲公鉅夫奉詔求賢江南欲薦府君才可用監簿君止之曾未幾何部使者趙君孟迎以茂才舉署饒州路儒學錄改袁州陞南雄州儒學正士皆服其化而爲率德勵行之歸會科

目詔行府君欣然應書不利退而歎曰吾能損所學以徇時好哉因不復踐場屋鄉友范文白公樞清脩之士也極慎許與憫府君官不充其才會御史銓選廣中力薦之於是拔授韶州路儒學教授未及上吏部已別選遂止賢公卿多稔府君行欲強起之府君辭已而長子受辟爲校官季子以春秋舉于鄉取第五名文解府君喜曰吾何以仕爲乃陶然自放清泉白石間與高人逸士相游樂府君被服儼雅揮麈談笑皦然如霞外人世間塵土不可得而侵也善鑒定古器物暨法書名畫每傳玩以爲適或取琴鼓一再行焚香默坐超然與造物者游一日遘疾預告終期召婚友入榻前與之言別意甚懇懇介婦方歸寧命趣之還旣至正衣冠起坐撫幼孫頂曰吾遲汝久矣復東首而臥翛然而逝實至正七年春三月某甲子也壽七十有五斂之日風雨晦冥室廬之後大木俱拔君子異之九年春正月壬寅奉柩葬于屏山麓堪輿家謂不利以某年月日改葬同里夏方之原府君孝友天至監簿君得瘡疾甚劇府君泣禱上下神祇夜夢三士告之曰服二附湯當瘳已而果然歷十餘年方沒監簿君沒大母陳夫人年垂九十府君懼夫人之哀夙夜祇奉唯恐少拂其意夫人安之曰吾子雖亡不沒矣季弟甫艷出爲伯氏後仲姊生四子而夫亡子絕幼茫不知所爲計從父兄孤子凡三悵悵無所依府君皆鞠養教訓之使至成立且歸其產所入毫毛不以私其與人交一裁之以義郡守李章肅公倜聞府君爲佳士禮下

之李公後以誣免官其門可羅雀府君事之益勤別駕高翔其知府君不下於  
李公及改守浮梁欲一見府君走書速之府君卽日命駕旣見相勞苦甚勤未  
幾徑上馬出城去翔聞之大驚追餞十數里且曰公能遠來何據往如是耶府  
君曰旣見君子不還將焉求翔歎息而去性尤仁慈振貧卹匱每不遺餘力臨  
川姜肅長沙譚志仁旴江王旭皆顛沛流離數瀕於危亡府君能振之是三人  
者德之謂殺身亦不能報云府君容貌魁梧須髯如戟爲文辭不務鉤章棘句  
而一以理勝當是時若吳文正公澄虞文靖公集皆海內師表每稱府君之賢  
不少置則府君信賢矣初監簿君著史學統紀一卷未及成而沒府君補完之  
府君所著詩文若干卷因自號唯庭遂以名橐吳公爲序作者之意今藏於家  
府君娶義門劉氏克盡婦道三十一年卒子男子三人長曰紹唯平陽州儒  
學教授次曰斯季曰魯承事郎祠部主事博極羣書而文辭龐蔚學者師之子  
女子一人分宜縣儒學教諭聶景堂其壻也孫男七人曰垕曰基曰騫曰均曰  
埴曰塾曰圭女六人長歸某餘未行曾孫男六人女四人在幼嗚呼聖賢之裔  
自北而南者若孔氏之於衢顏氏之於蘇於閩曾氏之於豫章皆多子孫而曾  
氏爲尤盛紂朱拖紫以顯融于時在在而是常侍五傳至文定公輩兄弟者出  
遂以辭章名天下何曾氏之多賢耶府君之先蓋與文定公同出於常侍奕世  
以詩書亢其宗府君雖不獲大用屢司教鐸蔚爲經師達賢大官亟稱交薦可

謂無負於家學者矣府君之葬翰林待制杜公本國子司業曾君堅既爲前後撰銘刻諸幽室而魯嘗與濂同脩元史寅緣交誼復來求隧上之文濂聞較德焯勤在古者不厭其詳故爲表其行而益之以銘銘曰

鄆國傳道自孔門遺澤滂滅苗裔蕃有如大江從西奔支流雖千會一原重珪疊組光燉燉著勳昭德裕後昆夫君繼之如玉溫蔚然頭角譽彌敦目爲二俊起纘繙三爲人師教道尊書詩俎豆習禮文鄒魯其俗澆爲淳自內而外本則存大木斯拔風霆掀人琴俱亡海氣昏學子攬涕爲招魂刻文墓石揚清芬

故鄱陽劉府君墓志銘

君諱謙字友諒姓劉氏其先出自彭城唐末有名汾者仕至鎮南軍節度使生十四子一子曰漢吞始徙鄱陽圖譜喪至君不知其幾世君善積居之術以貲雄於鄉父母歿廬墓終喪事三兄謹慎三兄或酗酒破產君屢贖歸之因自懲以全其家他族昆弟析財致訟久不解君召而尤之皆頓首免冠謝相讓爲善行已而割田來上曰微公我等幾爲吏所魚肉且失同乳心敢奉此爲公壽君笑而麾之自是鄉鄰有鬪者赴憇君得片言則拜舞去甚者能自愧搖手相戒勿使劉君知至正末兵亂且大饑惡少年烏合爲盜椎埋剽掠無不爲夜有執火薄君廬者君倉忙率妻孥遁泉布悉爲所攘豪傑德君者部勒壯士捕少年屍之懸首于門君歸見之擲于郊縱其家收瘞盜聞賓所攘戶外而去他日盜

益熾巨室盡燬獨君家屹然風日中君時避地萬斛山爲盜所執將榜以求金  
忽一人躍出曰此翁嘗恩我不可害不可害君賴以免性喜讀書積至數千卷  
爲文辭貴理勝不尚浮縟人稱之高祖某宋某官曾祖某某官祖某某官父某  
妣程氏配室李氏前君一年卒子男子一德裕子女子二蒙古學教授陸士奇  
及胡璉其壻也孫男三人曰仔肩曰鼎和曰吉仔肩以文行名君生於至元乙  
酉十二月二十九日沒於至正癸巳十一月二十五日壽六十有九卜以是年  
十二月某日葬于堂鄖山原距君所居僅二里君旣葬仔肩持張祠部丁所次  
狀求埋銘金華山中余以病弗及爲去年春蒙恩召入禁林與仔肩會京師仔  
肩復申前請爲尤切禮宜銘銘曰

行孚於家而施及於鄉如彼泉流肇於濫觴其始則微其終則彰此爲有德之  
士之藏雖亡弗亡

故高府君擴銘

高府君歿於建業時建業新附人情未安歿之明日其家僮卽具棺斂權瘞西  
門之外郊瘞已間關往報府君季子暉暉方從軍丹陽將達僮卒于道暉因弗  
及聞一旦有告暉者曰爾父歿已久矣暉卽白軍帥往求之則當時執役之人  
皆征戍遠方無一人在者暉彷徨西郊外但見白烟涼草叢塚纍纍不知孰爲  
其親體魄之藏號慟幾絕者數四自念無以慰罔極之恩乃命畫師識府君者

追貌其象裝潢爲燈軸事之如生雖若可以自解然終未足以盡其誠於是請國子錄張君丁件繫府君之行以成書謁予豫爲之銘他日招魂旋其鄉欲具衣冠葬之且勒銘貞石以示子孫於無窮焉余不敢辭府君諱翥字伯舉姓高氏濟南棣州人曾大父溫金經略副使大父玉元至元中從大將平江南遂隸名於平江十字翼萬戶府君籍久之以功補其府鎮撫父珪隱遜不仕妣韓氏府君性疎朗讀書傳頗通大義輒棄去喜騎射遇駿馬必傾貲市之挾弓矢跨行如飛既而中正鵠不失毫髮觀者嘖嘖嗟賞以爲有將家子之風然居家守於禮度不敢稍自違越其事母夫人飲食必親調衣衾則視時燠寒而進退之同里閈而居者多豪俠之子剗腴擊鮮日夜痛飲以示侈靡府君過而弗睨唯見餓夫單人輒解袍衣之輶膳啖之唯恐有不及癸酉歲儉大疫且四起道殣相望府君時買櫧檮藏之府君嘗以泉布貸諸人人久不能償府君曰彼非負我者特爲貧所迫故爾取其約齋焚之其於物有恩類如此至正中江浙行中書察知府君才行命隨蕭將軍捕寇海上府君屢建奇略將軍不能聽府君噤不發一辭已而寇不可制方悟不能用府君也府君寡言笑與人交不爲翕翕熱久而益親人自不忍厭去嘗築室曰進齋監察御史孟公昉爲之記人因以進齋號府君云府君嘗教其子曰我家近於海濱以弓馬植門戶田桑供衣食雖不多讀書家法素謹至今弗敢墜爾曹益務力善毋爲祖考羞使他人稱汝

爲善士我死目亦瞑不然雖日宰百羊馬饗吾吾將不食而吐之矣世以爲名  
言府君娶懷孟禹氏生三子長某次桂榮歿于兵次卽暉國子助教府君享年  
六十卒於某年月日葬於某年月日墓在某縣某鄉某山之原嗚呼戎馬擾攘  
之際人得令終者鮮矣縱得令終卽具棺斂而藏之者尤鮮矣縱得斂且藏得  
有賢子孫追慕而不忘者鮮之又鮮矣縱有子孫日追慕之其有狀其善行求  
文以刻諸墓門者則又絕無而僅有者也府君之死固爲不幸今有令子若暉  
者汲汲圖文以托府君於不朽府君似可以無憾矣銘曰

其名則武其行則儒其內則嚴其外則舒其超然拔萃者歟其確然有守者歟

元故靜江路大墟務稅使王府君墓志銘

王府君諱善字復善其先由鍾陵徙金溪自曾祖父重祖父榮彰父寶雖無仕  
者皆以徽行聞於人人府君成童時人試以屬句脫口成對比物別類爲精已  
而學爲詩輒取能聲年十三父喪去御家事尋操奇贏之術游七閩家乃大穰  
自歎蚤廢學力迪其子以經術築精舍一區聘碩士居之朝夕策厲若斯須不  
忘去者俄俾從師二千里外膏梁之饋絡繹道塗曾不以爲煩及見長子經用  
禮經連領鄉薦喜曰有子能通經吾雖廢學政復何憾至正中天下兵動江右  
化爲盜藪府君室廬盡燬崎嶇攜家走山澤能以智馭下帖帖然寧且資用亦  
無乏絕智者心服之先是有授府君南豐醫正者府君以醫爲一藝弗上方嶽

大臣又薦爲靜江大墟稅使亦不就至是翛然自放山水間舉觴屬客撫髀高歌遺落世事或飲至一石不亂未幾以疾終壽六十三寶洪武戊申五月十五日也卒後三年當辛亥某月日葬柘步山中禮也府君娶曾氏子男三曰經承直郎刑部司門員外郎曰綸金溪醫學教諭曰慶郎蚤卒女三胥豫其壻也一夭孫男五曰翼曰興曰憲曰德昌曰有慶予嘗聞經言府君之善行不止是其事親尤孝視聽恆在形聲之先奉繼母亦如之遇羣季多友愛人取以爲法嗚呼若府君者其所謂一鄉之善士非耶銘曰

孝聞于鄉道則允臧閟不自耀唯子之教彼遺金籜我以一經賢愚殊軌曰圖其始學之爾惇是昭乎文吁其死矣不復還矣孰廓其潛太史氏濂

故東吳先生吳公墓碣銘

惟吳氏初自延陵而分圖譜之局廢不能詳其爵里世次五季末有諱嗣者自廣信遷撫之金溪其諸孫宋含光尉邦基生郇從象山陸文安公傳道德性命之學郇生福州教授行世行世生太學進士益益生鄉貢進士饒漕貢進士可景定甲子進士名揚兄弟並以文鳴可生泰連泰連生儼儀儀字明善世稱爲東吳先生自幼以續承家學爲事雖初號輒起秉火披冊而讀之時建昌江公存禮謝公升孫皆前進士先生負笈從之游繼登鄉先達虞文靖公集之門於是博極羣書其學絕出於四方先是元至正甲申先生伯兄儼與其子裕同舉

進士裕連三薦始擢辛卯進士第名在第二冠南士之首及至丙申先生暨再從弟立感又薦于鄉立饒之孫感名揚之孫也鄉人榮之指先生之居相語曰是家在前朝以明經詞賦知名者先後相望今復如斯書詩之澤厥有衍哉會海內兵起先生遂無意北上下帷講授遐邇學徒爭奔走其門先生隨其資器孳孳訓迪必使優柔厭飫而後已凡所敷繹皆五經奧義不拘泥於箋記而大旨自暢晚尤殫心於春秋且謂聖人之經一而諸家異傳大道榛塞職此之由乃著三書曰裨傳曰類編曰五論辨辭義嚴密多先儒所未言嘗撫卷歎曰此書吾積學之所以致後世有揚子雲其將好之矣然於文辭尤豐贍有力下筆之頃思如湧泉開闔抑揚不愆矩度論者謂如晴巒出雲氣勢突兀不假雕琢天然成章先生則曰作文不原於聖經不關於世教雖工無益也先生涵養既深造詣益殊其於律己之功莊慤而端嚴隆寒極暑必正衣冠而坐家人聞其聲歎輒肅容而立不敢妄動天性篤於孝友事二親唯恐違其意季弟偉蚤夭其室周氏方少子衷僅五歲先生經營其家撫衷至成人周氏得以遂其節先生爲人剛直自將異懦者不侮強禦者不畏或以非理來撓必峻言折之其人悻悻見於色弗少顧稍知感悔卽遇之如初有寸善播揚唯恐不聞壬辰之夏縣燬於寇所在惡少年持白挺相挺爲亂先生推牛釀酒集里中耄倪諭以禍福皆稽首聽命他鄉爲亂者皆罹草薙禽獮之慘或無子遺獨先生之鄉獲免及

入國朝撫州守侯君元善聞先生名欲聘起之先生以病力辭洪武庚戌江西鄉闈試多士府判官王黻夢州城中迎狀元既而先生之子伯宗實在首選明年辛亥對策大廷復以第一人賜進士及第召見奉天殿授承直郎禮部員外郎或者以夢之前徵爲先生世科之符而先生已歿不及見矣先生之歿在辛亥二月二十八日上距所生大德丁未之歲得年六十有五配何氏生丈夫子三人長卽伯宗初名祐今以字行次禴次祁皆以經術教授州里女三人曾雅周禮黃顯其壻也孫男一人某女三人尙幼初伯宗會試南宮予嘗奉勅與考試事伯宗因來謁以先生文集序爲請予未暇爲而先生訃音至矣伯宗乃泣拜求撰墓文將還以其年某月日葬里之毬場山且勒之縣縉之碑予聞世之右族重珪疊組者有之矣索其家學相仍數世而弗墜十百之中或一二見焉況夫科名尤造物者之所斬哉今先生之門何其奕葉聯輝至於如是也此無他山厚則木繁海深則川聚其亦理勢之必然耶自時厥後繼繼繩繩予知未有艾也雖然先生之學則又在乎科目之外經不可不窮也德不可不脩也業不可不廣也欲法先生者法此足矣是宜銘銘曰

吳氏之裔何蟬聯兮科名接武代多賢兮先生承之志益騫兮嚙濟道腴涉幽元兮袞斧法嚴聖有經兮傳者角立分戶庭兮我蹟至隱發精明兮剔抉浮翳朗日星兮窮經致用時則屯兮薜衣棲冠甘隱淪兮振揚教鐸鬯乃文兮牖其

天衷德潤身兮世降俗偷病逾深兮方倚愈盧起痼沈兮祕其正陽平羣陰兮  
儒行之卓岡弗欽兮一鑑之亡我心傷兮其人雖逝名則良兮有寧一宮氣鬱  
藏兮焯德著美薦以石章兮

故熊府君墓志銘

熊以王父字爲氏蓋本於楚鬻熊之後至曾孫繹成王封於丹陽丹陽今之江  
陵枝江也其後徙於南昌若太常卿遠臨江尉曜戶部郎中執易皆南昌人執  
易爲右補闕與陽城同上疏極論裴延齡之姦君子多之其裔孫某復徙居於  
臨川某生繹好施與貧病無告者賴焉性嗜浮屠氏說嘗捐田七千三百畝畀  
其徒其徒以居士號之三傳至宋迪功郎公琦迪功生待問亦迪功郎待問生  
鄉貢進士紹祖進士實生府君諱本字萬卿一字萬初幼穎悟經史一覽輒成  
誦父子自爲師友時家已窶無藏書可觀每假於薦紳家懸燈夜讀至夜分弗  
自休年十五入鄉校習科目之文私試數占前列十八卽下帷講授郡之後乂  
多從之一時名士如澹軒孫公轍天傭熊公朋來麟洲龍公仁夫文安揭公僕  
斯皆交相推譽或折輩行爲忘年交翰林學士承旨張公翥方爲郡學錄尤與  
府君意氣相傾會輒流連竟日唯恐其別去已而以尙書貢于鄉再不利乃歎  
曰場屋失得是有命焉我不敢必也苟窮經以飭諸躬其有不在我者乎吳文  
正公澄倡道於崇仁山中南北學者翕然景附府君遂負笈徒步往從摘經中

所疑七十二條反覆詰難吳公一一答之中其肯綮府君爲之喜而不寐間論古文尙書亹亹數千言援據精切辭意超卓吳公器之謂非時輩所能及宋季時須溪劉先生辰翁以文辭名一代人爭慕效瀾倒波隨府君獨疑其怪僻非文章大家因究極原委著之簡編質于虞文靖公集虞公以與己意暗合亦器之如吳公且以涵養問辨爲學文之源是勗府君自此以講學摛文爲務視世之榮利如烟霞變滅絕不足以溷之向之後又來學者至是益衆府君舉聖賢之大指諄諄誨誘咸卓然有所立雖其後更名他師而篤實有質行者則府君之所啓也其遇子弟嚴威儼恪終月不見其有笑容夜則危坐令其誦書雞初號則趣之起風雨不少廢府君之伯仲凡三析筋別爨已久及父母歿喪祭之費頗鉅府君悉力自任不以煩之女第一人未有所歸亦擇名族而資遣之然天性仁厚或以虛僞相加壹接之以誠而人自不忍欺至於處義利之間絲毫不苟也生平不屑理家政優游肥遯不知戶外有山川之險舟車之勞每夕命觴徐酌哦古詩數章陶然自適如鴻飛冥冥了無繫累會四方兵亂長子鼎爲校官廬陵音問不通府君憂之往往形諸詠歌一日徧過故人門薄莫言還復張燈而飲飲微醺以鼎不在左右悵然就寢是夜大雷電以風鼓撼樓牖作伊軋聲府君披衣而起命蒼頭奴負階親升而闔之旣降忽呼曰予足輕矣奴以肩翼之至地府君右手倚肩左據階之齒而終時至正癸巳歲二月四日也享

年六十有六娶黎氏鄉貢進士天桂之孫女能齊家內外整飭府君得脩業而無費事黎氏力也後十有一年卒生三男子長卽鼎入國朝累官山東道提刑按察副使今遷中奉大夫晉王相府王傳次曰渙將仕佐郎開封府長津縣主簿季曰晉女二一適趙灤一適龐舉早卒孫男四曰綿曰赳曰繩曰昂孫女一未行府君歿後三年丙申之歲七月六日始卜葬於金溪縣苦竹鄉之富塘原其所著書有讀書記二十五卷經問四十卷讀史衍義若干卷舊兩集五十卷虞公爲之序謂其雜著本理而敷暢典雅而不阿人以爲實錄外有朝野詩集五百餘卷吳山錄三十卷仁壽錄一百卷吳山卽記吳門問辨之所得者仁壽則手錄虞公之文也今年春予與鼎會京師乃奉祠部主事張君孟兼所造事狀徵予銘夫自吳公繼承伊洛之緒於將墜之餘完經翼傳扶祕闡幽所以化導其徒者多成德達財出而用世固顯融于時其有隱于州里橫經陳義使人厲士君子之行者亦往往有焉若府君者是已嗚呼師道立則善人多濂於吳公徵之銘曰

咸口之里紫氣蜿蜒篤生偉人大道日降一綫之傳凜乎將堙勇撤其蔽所覲者全行知尊聞罔間南北疊跡重肩從者如雲君鼓其篋搵衣而前無疑弗馴雅奧難測孰鈎其元百篇之文矧於羣經孔疏鄭箋曷其縝紛蒙蔀斯揭日星乃懸有光燉燉屏斥詭誕以絕蔓延以表孤存化行里州太和芊綿郁其成紋

其養也定乘化而旋奚啻詛信有子而令珪組蟬聯遺澤之新仰睇飛雲俯臨逝川誰不顰呻惟行之粹惟石之堅勒文墓門

故三槐隱士王府君墓志銘

予以總脩元史被召來京與浙江部使者劉君承直會劉君曰承直嘗受經於太和王先生先生之歿今七年矣而埋銘未有所刻其子佑將奉狀以請幸爲文之既而佑復申劉君之言涕泗而再拜予旣答拜與之成禮遂按狀而評隲成章其辭曰君諱以道字則臣姓王氏系出周司徒敬宗傳於秦武成侯離生二子元威元遷琅琊威徙太原二族甚盛晉丞相導出琅琊之裔南渡時家于江左至趙宋時有諱崇文者來知吉州其從子殿中侍御史贊實從之復遷居吉之太和太和之有王氏自贊始殿中君之後名圭開禧三年鄉貢進士君之高祖也進士君生叔可肄業成均以辭章稱叔可生本初本初生性夫皆爲名儒則君之曾祖祖父也妣劉氏宋知潭州事天定之孫女君資稟絕異自幼學詞賦組織華縟見者翕然譽之已而棄去曰此非所以爲學也欲求聖賢之道其在遺經乎於是潛心窮研晝夜弗之倦時從祖父遂初自國學上舍生還第所交多宋季名士日集其門相與談前朝文獻纏纏如貫珠君從傍聽之心領李秦公孟侍焉伯剛往言於秦公以君爲薦君獻詩一章仁宗覽之大悅君遂

極論天下事曾未幾何武宗卽位立仁宗爲皇太子伯剛邀君同至燕都君毅然辭之伯剛寵幸盛于一時及仁宗踐阼遂累官至汴梁路總管復趣君曰上去一日至洞庭之君山遇異人長鬢碧瞳如古仙人授以龍虎金碧丹經君受而行之氣志益沖鬯自號爲三槐隱士乃於所居種竹鑿池池上橫以石牀角巾鶴氅日息其上子姓環侍之談吐餘音出於水光篁影中其隱趣蓋翛翛然時或賦詩以爲樂韻度閒曠一如其人云君性至孝父母皆高年君率羣從奉觴稱壽唯恐稍違其驩暨歿哀號戀慕幾欲無生且悼於友義族兄弟姊妹未婚姻者畢之伯叔之未葬者藏之君子多稱焉至正末天下大亂太和禍尤慘殺戮到雞犬羣寇聞府君名指君廬相戒曰此王隱君家也慎勿毀之至今獲存君所著書有詩集若干卷丹經新注若干卷其生以至元庚寅十月一日卒以至正甲辰六月二十二日壽七十有五以洪武戊申六月十一日葬于縣之千秋鄉新山大嶺之原禮也君娶彭氏能盡婦道前君一年卒子二人沂前鄉貢進士佑從州縣察舉試校官京師上以其才可用拜監察御史轉遷廣東提刑按察司事卽來速銘者女二人彭道長劉以和其壻也孫男一人泰孫女二人尙幼嗚呼世之有功業者易於言而潛德積於躬而未及試者則雖竭其形容或不足以盡之蓋有跡者可窺而無跡者難知也以君言之際可仕之機而